

摘藻堂四庫全書薈要

集部

欽定四庫全書薈要卷一萬九千九百五十七

集部

宋文鑑卷三十四

宋 呂祖謙 編

制

除趙普門下侍郎同中書門下平章事集賢殿大

學士制

閎散同功歸馬遂隆於周道蕭張叶力斷蛇因肇於漢
基必資佐命之臣以輔興王之業推忠協謀佐理功臣
樞密使光祿大夫檢校太保兼御史大夫上柱國天水

縣開國伯趙普功參締造業茂經綸稟象緯之淳精契
風雲之良會洎贊樞機之務屢陳帷幄之謀沃心方佇
於嘉猷調鼎宜膺於大用俾踐台衡之位仍兼書殿之
榮爾其罄乃一心熙予庶績君臣相正勿忘獻納之規
夙夜在公勉致隆平之化往服休命無愧前修

除呂蒙正中書侍郎兼戶部尚書平章事制

李沆

天道無私日月星辰助其照皇王不宰股肱輔弼代其

工所以端拱守成垂衣制理永建丕平之景運遐追三代之令猷其有業茂經綸才推謹厚參大政而已淹星歲秉至公而無捨寅昏宜頒出綽之殊恩俾正持衡之重柄爰擇剛日特降命書推忠佐理功臣朝散大夫給事中參知政事柱國東平郡開國男呂蒙正四氣均和五行鍾秀有濟時之略輔之以溫恭挺命世之才守之以循默爰覩舜旌之進善遂指魏闕以來儀臨軒覩敏贍之能射策見縱橫之畧暨茲登用益著謨明公忠推社稷

之臣凝重見廟堂之器眷茲大體久鬱具瞻屢宣作礪之功克懋秉鈞之績別錫褒功之美號仍陞馭貴之宗階勲籍增榮井田加賦預列侯之峻爵同大吏之計書顧優恩之在茲諒名器之無假於戲雲從龍而風從虎今也其時啟乃心而沃朕心必求諸道爾宜周旋庶政佐佑眇躬緩茲宵旰之憂翊我隆平之運同底於道豈不美歟

除文彥博判大名府制

歐陽修

朕惟將相之崇資是為文武之極選隆其名器所以重朝廷列於蕃宣所以屏王室矧乃居留之任必屬老成之人爰擇剛辰敷告有位具官文彥博器閎而厚識粹而明學得其方通古今而知要才周於物適大小以惟宜自奮發於聲猷早更揚於中外居則參裨乎國論出則宣暢乎皇威兩踐台司首當柄用賢愚式序舉百職以咸修綱紀甚明贊萬幾而至悉自懇避鈞衡之任出司管鑰之嚴逮此逾時蔚然休問眷言邦哲實簡予衷

是用更其擁節之榮委以別京之重勁兵所宿是資總
制之權雅俗惟淳兼賴撫綏之政於戲與國同體是謂
股肱之良惟民具瞻方隆師尹之望顧我舊德豈煩訓
辭徃其欽哉祇服休命

除皇弟允初依前檢校尚書右僕射充感德軍節
度使加食邑食實封餘如故制 歐陽修

爵賞當功則為善之勸廣名器不假則至公之道存然
而隆恩睦親所以厚乎風俗建侯作屏所以扞于王家

非余敢私乃國舊典具官允初質性純茂稟乎天姿學
問發明由於師訓維我叔父時為賢王緬懷遺烈之存
屬乃克家之善自被蕃宣之寄久參朝請之聯宜從留
務之繁進委臨戎之重節旄並建井賦兼增僉謀克諧
寵數惟渥於戲干戈衛社內有宣勤夙夜之臣甲冑在
躬外有奮力行伍之將爾其念晏安之懷毒知富貴之
難居戒損於滿而罔敢自驕勞身以謙而克保其位無
忘勗勵往服恩榮

封皇弟九女福安公主制

歐陽修

朕稽有國之彝章著皇女之稱謂取其主以同姓所以見王體之尊必也錫之美名所以彰禮命之寵載涓吉日敷告在庭皇弟九女岐嶷之姿有生知之異稟柔順之質得天性之自然方嚴保傅之規以養肅雍之德俾遵舊典褒以徽章嘉乃妙齡盛哉儀服考僉言而惟允非予意之敢私於戲隆仁恩以厚親茲惟教愛習圖史而循法繫乃夙成祇若訓言往膺渙渥

除皇兄允弼武康軍節度使加食邑食實封制

宋 初

朕惟一二兄弟屏扞吾家每推骨肉之愛以强本根之
託矧在邇屬早休厥聲適及剛辰進膺異數具官允弼
甚德而度參仁以和居貴而罔流心訓恭而遠祇悔間
陪郊獻佐庀宗司抑抑攸儀舉皆率履綽綽斯裕內無
違言成予叙親時乃修職比者雖䟽王爵未厭寵名宜
停後務之繁俾領元戎之制增食爰賦兼實幹封於戲

盤石而宗寄莫重焉扞城於國義莫先焉可壯非猷可
順非迪仍輟就藩之遠姑隆綏族之恩徃惟懋哉顯對
嘉命

除皇弟允迪安靜軍節度使加食邑實封制

宋 祁

朕聞立愛莫先於親繁支實庇其本每念攸訓匪伊異
人用推敦序之典期光夾輔之體具官允迪承燾天祐
衍慶宸筭舉動嚴方趨步閑敏思長富貴之守寢肄朝

夕之虔向留使華允穆公路頃以王邸殂謝予懷悼驚
念其堂構眷深橋梓維城有寄墨經還朝載隆近屬之
恩俾領中軍之節仍增邑食且實戶封於戲乃考之忠
勛四邦是式乃兄之光寵十乘有儀爾偕厥榮毋或茲
忝欽卽殊獎祇勵遠猷

立皇太子制

張方平

維我祖宗繼天統業積有功德克享上帝之心肆其子
孫永承百世之祀朕祇纂謨烈詳覽古今繫崇建於元

良實保安於國本上尊宗廟孝無大於奉先下庇生民
教莫逾於居正式宣顯冊敷告萬邦爾皇長子具官頤
英粹日躋中和自至仁義充涵之美言動惟時禮樂交
錯之華威儀可象抑畏疏封之重敏修典學之勤亦既
多聞足當大受是宜誕膺徽命肇啟儲闈懋升明兩之
輝益廣在三之道非余有私於爾頤惟天祐於余家衍
寶祚之靈長成寰區之慶賴往慎厥德以答揚我列聖
之光訓丕曰休哉可立為皇太子有司擇日備禮冊命

施行

除皇兄宗諤保靜軍節度使制

張方平

朕惟前王懿德治古舊章必隆蕃屏之親以穆懷柔之體矧居邇屬夙著令名宜揆剛辰誕揚休命皇兄具官宗諤甚德而度參仁以和近雅不流繹如鍾呂之正內明自炤瑩若珪璋之溫率履無違在宗有裕特推恩典之異聿示表儀之光錫爾駢旄屬之瑞節時庸褒叙式昭寵嘉於戲祇畏者保身之永圖恭儉者有家之長業

事近効遠罔或忽諸往惟欽哉尚克終譽

除韓琦守司徒兼侍中鎮安武勝等軍節度使制

張方平

朕先宅萬邦肇新駿命正權綱之遠御審名器之大方
眷予宗臣特崇異數以表圖勲之重用昭報禮之隆爰
揆剛辰誕揚贊冊具官韓琦宣昭賢業熙亮天工光翊
三朝咸有一德材周五則之用體脩四時之和社稷是
經文武惟憲在成功而弗處實有大以能謙荐上奏封

懇辭政柄顧倚毗之厚詔諭數頒而精懇之堅辭誠難奪
增寵上階之峻特開兩鎮之崇蔽自朕心事非舊典當
盛辰而均逸望故里以榮歸大業甚明休靈殊渥於戲
臣行其志茲為自得之全君篤於恩深惜老成之去無
安帥節之樂猶待衮衣之還乃情本朝遐不謂矣

除呂公弼樞密使檢校太傅制

張方平

本朝之制地分二府之嚴執政之臣共幹庶邦之重文
武承式兵民是圖屬在賢明總司使職誕敷明制敬告

大廷具官呂公弼器縉純明機靈精遠瓌材任重中廣
屢之棟樑雅音自和合清廟之琴瑟登貳樞機之密洽
聞議慮之長屢陳憂國之言多發便時之策深明王體
有簡朕心宜陞帝傳之崇以正本兵之任爰田增賦真
食衍封名器益隆典章允穆於戲信而能用嘗思明哲
之難知無不為期盡臣鄰之益祇若休命以贊大猷
除李昭亮殿前副都指揮使寧武軍節度使制

張方平

外擁節旄方鎮元戎之重內司禁衛太微上將之雄匪
時英材疇若嘉命圖用親率宜揚大庭具官李昭亮誠
稟忠淳風力敏給世載其德有狐趙之舊勲文定厥祥
迺姜任之高姓早階華顯允蹈中和入從法從之華出
領翰垣之要屬以軍政契于士心訓撫有方簡稽允肅
眷殿巖之離衛悉王旅之選鋒典茲中權職在圻父特
賜節旄之命爰將注意之隆峻以等威統諸環列於戲
齋鉞所付是為主之爪牙蘭錡之嚴實曰予之心旂勉

旃誠報茂對寵休

除曾公亮檢校太尉充樞密使制 胡 宿

經遠慮微必慎制兵之術折衝消難亦資畫策之臣是
憲樞躔聿崇使號蓋政謨之攸寄匪耆哲而莫居適得
其人誕敷厥命具官曾公亮風業碩茂志慮深純學多
貫於前言性頗修於中道有方重之德可以抑躁而鎮
浮有明達之材可以造機而成務當講勸於左右亦召
置於禁嚴博我訓言代予明命用請臨於宸輔遙擢典

於京師咸有治功遂聞政本通明練於百物參和穆於羣言貳公之司久陪於論道內密之任宜正於筦樞仍加傳導之名更益陪敷之數崇階馭貴真食衍封並示寵章式旌殊禮於戲典機之任莫慎乎微擊柝之言蓋取於豫勿謂承平之久益思備禦之深祇服斯言往踐乃位

除王德用依前檢校太師同中書門下平章事兼羣牧制置使充樞密使河陽三城節度使加食

邑實封仍改賜功臣制

胡宿

內樞之地，上範於斗宮，前筭之籌，參寄於人傑，以經常武之事，是號本兵之司，圖冠厥名，疇總予務，乃眷元侯之長，早崇右府之聯，爰擇剛辰，復還舊物，具官王德用，志懷果烈，風檠沉雄，通於竒正之謀，居然英傑之氣，春秋閱禮，韞義府以惟深，甲令書忠，載世家而有舊，比膺推轂，荐歷干城，先十乘以臨戎，長萬夫而觀政，德刑具舉，威惠參施，能名播於外夷，沉機隱於敵國，鼎咨俊望。

擢典繁機翼濟事功迪宜忠力孚乃誠而匪懈研諸慮
以惟微旋均基宥之勞亟樹藩宣之治蹈險夷而一致
服忠孝而兩全簡在朕心洽於朝聽是用升鳳池之寵
秩聯虎節之榮章倚殿輔邦用陪京室屬右樞之闕職
咨羣岳以擇材僉曰汝賢宜弼予治益天子二老出以
居方伯之尊寰內諸侯入則處公卿之任仰惟曩制舉
是隆名用起壯猷使纂舊服仍峻雲臺之號兼增并牧
之封式厚耆英有加名數於戲樞機發令制戎事以惟

艱樽俎折衝經人謀而匪易往慎乃位益思其忠

祁國長公主進封衛國長公主制 司馬光

帝妹中行易象贊其元吉王姬下嫁召南美其肅雍命服亞正后之尊主禮用上公之貴寵光之盛誰昔

釋訓誰昔

昔也而然矧同氣之至親推異數而何愛祁國長公主席

靈長之緒承濬哲之祥稟乾坤之粹和鍾日月之明潤淵懿可度柔嘉有章志女功而忘勞承師教而不倦今

玉笄在首厭翟戒塗方結悅於皇家將執笄

音煩竹器

於士

族宜疏沫土之邑俾適富平之孫庸展茂恩誕孚醲化
於戲琴瑟靜好式昭和樂之音雷風順承是為常久之
道勿以夫家之平素有虧婦德之聽從祇服訓辭永綏
福履

立皇后高氏制

范鎮

天子之有后如天之與地惠養萬物如日之與月臨照
四方苟稱號之弗崇則臣民之安仰京兆郡君高氏生
閥閱之後而不自矜大處富貴之習而能安素約服在

藩邸宜于家室肆朕纘承嘉乃輔佐惟長樂之奉養左右不可不虔惟六宮之表儀晨夕不可不肅爰正軒星之位以為國風之倡舉是典冊告於治朝於戲邦教所基人倫茲重塗山啟夏太任興周勤勞一時焜燿萬世乃其總筭櫛縱日侍慈顏衡統紘經時承宗祝庶幾天
下之俗知我門中之私

曾公亮加恩制

范鎮

朕觀前世之載考宗祀之文周漢舊章殘闕無次王鄭

異說雜互莫同大抵奉親以嚴率民以孝交神明於合
莫厚風俗之本原具官曾公亮執禮蹈方刺經援古變
均大化固已治平制定多儀又皆節適四時之氣其和
見於豆籩九州之力其精在於玉帛使朕得昭升烈考
裒對上靈誠意所通顧饗如答惟時顯相宜有褒嘉峻
階品所以明等威崇衣號所以懋功實陪敷多賦流行
真封於戲大典越熙至恩胥暨惟裁成輔相以遂萬物
之宜惟同寅協恭以收庶工之效庸昭貺施永乂基圖

除富弼樞密使制

范鎮

兵布於天下而至衆故統之有本元謀出於堂上而無窮故資之於明哲是以基於靜密式暢遠猷始乎幾微能成大務若時付畀茲謂劇艱前推忠協謀同德守正佐理功臣特進行禮部尚書同中書門下平章事昭文館大學士監修國史兼譯經潤文使上柱國河南郡開國公富弼文武相資柔剛並適誠貫金石材隆棟梁往在先朝嘗為上宰至言無隱精慮有開方國計之是毗

以親喪而遽去况夫西漢而下巨唐以還訖于本朝凡厥公相率就起復以為權宜而卿固執禮經懇辭恩詔三年始事四海具瞻再炳台符之文兼崇樞極之任重陪多賦庸示褒章於戲天命甚難神器至重始初纘紹正賴經綸幸元老之聿來偕衆賢而同濟庶幾涼德罔累慶圖

充國公主降沂國公主制

范鎮

陳車服之等所以見王姬之尊啟脂澤之封所以昭帝

女之寵茲惟親愛之攸屬時乃化風之所關苟不能安
諧於厥家則何以觀示於流俗充國公主生而甚惠朕
所鍾憐故於外家之近親以求副車之善配而保傳無
狀閨門失歡歷年於茲生事弗順達於聞聽深所駭驚
雖然恩義之常人所難斷至於賞罰之際朕安敢私宜
告大庭降從下國於戲惟肅雍以成美德惟柔順以輯
令名乃其恪思庶永來福

韓琦加恩制

王安石

朕祇率舊章肇稱吉禮對越天地具獲靈明之歆相維
公卿並膺休顯之賜其孚大號以寵元勲推誠保德崇
仁守正協恭贊治亮節佐運翊戴功臣淮南節度揚州
管內觀察處置營田等使開府儀同三司守司徒檢校
太師兼侍中行揚州大都督府長史上柱國魏國公食邑
一萬三千七百戶食實封五千戶韓琦躬受偉材出陪
熙運保茲天子進無浮實之名正是國人退有顧言之
行間朝廷之兩社操方域之萬邦辰猷具臧器寶加重

中辭機軸之要外即蕃屏之安衡統紘經備三公服飾
之盛橐鞬戟纛兼大將威儀之多序績既崇修方彌謹
協成宗祈之禮與有顯助之勞肆行本封申加美稱於
戲恩典徽數所以旌帝臣明德茂功所以獎王室往惟
勵翼服此褒嘉

李璋加恩制

王安石

若昔大猷紹天明命必有獻享之禮作民恭先必有褒
嘉之恩自國貴始翊衛功臣奉寧軍節度使鄭州管内

觀察處置河隄等使光祿大夫檢校司空持節鄭州諸
軍事鄭州刺史大夫上柱國平原郡開國公食邑四千
三百戶食實封一千戶李璋世載忠善躬服儉勤以后
家之洪支為帝室之隆棟入總營衛則兵師無譁出乘
藩維則吏屬不怠近付京都之籥外更方鎮之旄貢職
惟修祀儀獲考進加功號申衍邑封以疇服采之勤庶
協勸勞之典於戲富貴有危溢之可戒祿位匪侈驕之
與期圖惟慶譽之終尚協龍光之施

皇伯祖威德軍節度使榮國公承亮加恩制

王安石

朕裸獻廟室燎禋郊丘内蒙祖考之居歆外獲神祇之
顧饗嘉我近屬與有陪輔之勞揚於大庭使膺褒顯之
福具官承亮德義自表爵齒兼尊魁然肅乂之材尚矣
神靈之胄世承厥慶有跗萼之芬華朝賴以寧若翰藩
之嚴密乃相肆祀實綏思成進加奠食之封申錫詔功
之號於戲孝恭可以儀宗室信厚可以化邦人匪時親

賢孰朕承翼往肩寵獎尚協榮懷

李日尊加恩制

王安石

朕紹膺駿命稽用上儀祇事郊宮並受三神之福推恩
方夏外交四表之歡告於有司錫是在服推誠保節同
德守正順化翊戴功臣靖海軍節度觀察處置等使同
中書門下平章事李日尊躬懷德善世濟忠勤奠茲南
邦居有扞城之效衛我中國使無疆場之虞賜之大將
之旄胙之真王之爵往踐厥位知欣戴於寵章來獻其

琛用協成於熙事陪敦采邑褒進文階載加真食之封
式允懋功之典於戲人之所助惟怙冒於王靈國以永
存顧循守於侯度率時新命保乃舊邦

宋文鑑卷三十四

欽定四庫全書薈要卷一萬九千九百五十八

集部

宋文鑑卷三十五

宋 呂祖謙 編

制

除韓琦依前同中書門下平章事進封儀國公加

食邑實封制

王 珪

朕按奉高之儀思承上帝之福詠我將之什知配文王
之功諏辰季秋之良盡志孝饗之事應一郊之定卜躬
三歲之宗祈於時陳物采於國中接神明於堂上璧玉

溫潔染盛令芳靈光燭於大庭休氣蒙於重宇疇相丕
祀於顯元臣肆膺拜胙之釐首布告廷之命具官韓琦
命世發德佐王矢謀財萬化於物宜熙百工於帝載已
任沈機之斷力陳遠馭之圖若歲為霖可以濟天下之
旱如易占筮可以判天下之疑責大而智愈深事昭而
情猶勉廼先庚之詔靡物備而不嚴維日吉之文或禮
闕而不講使朕得裒六天之對款七廟之靈輯於昭曠
之儀顧匪烈文之輔茲庸錫之名壤建爾上公寢廣奉

田之腴復敦真食之賦汝為汝聽汝勞汝嘉於戲在福
不敢康蓋天有難忱之命於德如弗及蓋民無常懷之
心雖朝廷之甚休益君臣之相勅宜興盛治允答靈歆
除韓琦門下侍郎兼兵部尚書依前同中書門下
平章事進封衛國公加食邑實封制

王珪

王者紹景炎之序履皇極之尊永惟置器之艱屬在佐
王之畧睠夫上宰翼我先朝適及委裘之辰肆于奉瑁

之始定策宗社貫心神明逮躬丕務之咨敢後元勲之
獎首粵邦渙誕告朝倫具官韓琦器博而適時道閎而
濟物稟星辰之精粹會日月之休明歷宣外勞更倚二
柄蹈夷險之一節寄安危之大機仰文考之知賢絕時
髦而登用維召公之託嘗聞顧命之言維漢相之謀終
應大橫之兆蓋懷先見者識之邃決至慮者材之英天
扶不拔之基神贊非常之輔是用進文昌之卿序正黃
闈之台符隆以封爵之文益之戶田之數以蕃爾寵以

懋爾庸於戲天視靡私居飭有邦之畏民心曷戴一歸
厥后之仁念先猷之弗敢康顧成集之不可恃益經茂
烈永佐昌圖

除曾公亮門下侍郎兼吏部尚書依前同中書門
下平章事進封英國公加食邑實封功臣制

王珪

大火基宋實開五聖之符六龍乘乾遂繼中天之運乃
睠近弼荐更三朝元勳冠於百僚利澤施于萬世載蠲

穀旦敢告治廷具官曾公亮學通天地之微謀合聖賢
之舉包剛柔於九德固夷險之一心蚤膺皇祖之求爰
履公台之位有臯夔之論能變堯民於時雍有丙魏之
聲不改漢家之故事肆我文考遺予冲人咨顧命之老
臣輔初政於天下重宣至策終仰丕成進首中臺之班
往顯東省之務既疏榮於公社益躡數於爰田功之所
加寵不敢後於戲恐德弗類念高宗之未言俾民不迷
繫尹氏之素力共祇天監永協邦休

除文彥博樞密使賜功臣制

王珪

天極環樞上通帝位之紀神兵會府內嚴師律之謀朕
方垂講丕平進經常武雖天下無事思備禦之不敢忘
蓋王者有征視安危之不敢忽適登髦傑資以輔予具
官文彥博器閎而深材敏以濟早資賢人之業實膺聖
考之知以忠孝之名形家國之盛節以文武之畧輯將
相之大猷肆纂命於皇圖廼離憂於喪紀迨終哀戚甫
見儀刑屬疆事之方興煩師旄之載舉折衝境外方將

出憺於王靈收畫幄中曷若坐圖於廟勝宜長機廷之
務亶符巖石之瞻於戲過餌北戎未厭貪驕之志再盟
西夏猶苞狂忽之圖終佇奇勲用恢遠馭

除文彥博守司空依前樞密使加食邑實封制

王珪

朕若稽先王維御羣品左謀金鉉之老以經治於廟堂
右屬鴻樞之良以定策於帷幄厥有成績可勿褒乎具
官文彥博風力肅明器資恢傑臨至劇有轉圜之易定

大謀如執玉之堅逮事神文之朝已緝熙於鼎路追言
聖考之遇又密勿於機廷肆涼昧之丕承會精神於羣
慮雖兵民之異本亦文武之交修未隆贊冊之恩曷懋
圖庸之舉其保宏父允釐華陽顧豈明分之私終繫老
成之助於戲有若閔天尚迪文王之彛罔俾阿衡以專
商家之美徃篤爾烈永承予休

除富弼依前同中書門下平章事充武寧軍節度
使判河南府兼西京留守司事仍賜功臣制

王珪

三台處中以裁萬物之化四嶽總外以牧黎民之蕃如
山河之經九州如股肱之衛一體出處之際朕無間然
具官富弼復貫有元蹈中弗勉學幾聖而獨至識造物
之未形貴名起於三朝盛德儀於百辟鄉召從於列屏
俾進翊於冢司為日尚新何恙靡已未及經邦之務遽
陳避位之辭詔雖屢而莫回章甫卻而復至朕憮然自
念嗟莫能勝既閔勞於政幾其聽遂於私佚建彼徐節

以殿東郊守茲洛符以保西宅仍位鴻鈞之貴尚優黃
髮之行於戲不處成功專老氏榮名之畏其旋元吉要
義經履道之終雖弗從於吾游亦自保於而福

除陳升之禮部尚書同中書門下平章事集賢殿

大學士加食邑實封制

王珪

色齊三階則風雨不失其序聖如二帝然股肱亦繫其
人朕上撫乾緯之明下慎國鈞之寄方審求於賢輔俾
參穆於政途若時登庸益出定命具官陳升之識幾聖

蘊謀合皇猷學積於原而心彌充智酬於變而力彌裕
早膺仁祖之擢以遺文考之知肆予冲人克即大任問
甲兵則有能撫四夷之畧問衣食則有運理羣物之心
朕方稽百里之謨經一世之績宜進躡於賢序以延登
於宰廷夫知歷選之既難體委用之寄重則義莫得以
愛已道惟專於澤民豈特無疆之休亦有無窮之問於
戲論金穀之計其歸內史之司作霖雨之滋是應高宗
之命往熙帝載庸代天工

除程戡安武軍節度使加食邑實封再判延州制

王珪

周禮命卿司馬掌國征之事漢儀遣帥將軍額閫制之
權自非謀經帷幄之咨名厭疆垂之望則何以稽圖而
受社賜律以臨戎茲疇舊政之良式協師虞之望具官
程戡體忠忱之度蹈夷雅之風進塞藝文之華仕階名
秩之膺方先朝之籲俊更三府之告猷左右六年夙夜
一節肆纂休於皇緒適留寄於邊衝空深寤寐之思且

重安危之倚上金城之方畧猶知充國之彊習闕里之
絃歌還見祭遵之佚就付兩河之節存綏西土之封既
行食於爰田復倍輸於真戶風聲雖舊寵數維新於戲
制夷狄者備不可遽忘守方隅者勢不可數易蓋威素
申則敵情讐信久著則士心懷尚堅壯圖往服渥命
除曹侑保平軍節度使加食邑實封制

王珪

朕承景歷之昌嗣丕基之重渙敷大命胥澤羣元咨我

方岳之良時維屏翰之憲念宣勞於劇委稽渙獎於陟
文卜以剛辰告於列序具官曹佾體冲韻邃氣勁謀沉
傳圯上之神書託西京之肺腑顯允祖烈實為宗臣於
皇母儀克后先帝濟忠純於奕世履謙訪而保躬邇共
武之威廼踐元戎之貴助守文之德式繫外戚之賢進
導徽猷參聯台路肆纘膺於聖統方倚輔於英藩載䟽
冢社之榮增視上公之峻隆階表貴衍食敦封萃為寵
休以睦婣近於戲詔爵祿之柄天官以馭夫群臣錫車

馬之儀大雅以褒夫元舅蓋績美則報之厚愛隆則禮亦蕃往懋淑聲永綏多福

除李璋殿前副都指揮使武康軍節度使制

王珪

羽林神兵北環天衛之象黃帝李法中嚴邦律之師國家鬯武節於四遐提禁屯於千列進總凝嚴之護歷圖勁傑之資稽衆得人告廷孚命具官李璋氣沉而果事性裕而知方厲許國之單忠達治兵之善志緒服高華

之望名推親信之良朕念長樂之慈愴不及養顧渭陽之族聞益多賢自擢領於戎昭已積遷於留寄屬巖除之缺帥宜齎鉞之命才六纛啟途既襲重侯之貴萬兵留帳方資緩帶之安雖其素勞不曰異寵於戲執干戈則有社稷之衛常慎於假人聽鼓鼙則有將帥之思實深於注意維蹈忠義者急於報主益喜功名者要之逢時勉規壯圖尚率明訓

除郝質殿前都指揮使安武軍節度使加勲食邑

實封制

王珪

國家統御之勢大維持之業隆外倚四巖藩翰之臣中
謀萬夫貔虎之帥故奉委裘而羣情固聞受瑁而三靈
趨肇臨發政之辰首下放朝之命具位郝質性資莊厚
氣畧沉雄通玉帳之善經體金行之正氣自昔先帝知
為勁臣因其勲舊之名立在親信之地會綴衣之陳牖
提衛甲之環宮曾無夜蠶之譁自得剛牙之重紹帝符
於景祚渙邦號於前曩視秩冠於文昌徙節臨乎安武

加以總正使範敦封用旌巖陞之勞以表師干之寵於
戲天之壁壘象在羽林王之爪牙職於圻父蓋地嚴則
必資拱扈之力師衆則猶賴訓齊之方往堅壯圖思答
殊遇

除皇伯祖承亮檢校工部尚書榮國公感德軍節
度使加食邑實封制

王珪

蓋聞周典建土遂膺年歷之長秦失罷侯靡復藩維之
援此國家所以監用徃制封崇茂姻以夾輔於王家以

懷柔於天下肆膺皇緒渙舉丕彝皇伯祖具官承亮躬
耆德之英被忠訓之厚曾無車服珍寶之玩固有詩書
道術之明稽帝堯之仁疇先骨肉之愛願秦悼之後不
減祖宗之蕃自居留務之榮浸廣皇丈之譽按戊午之
新澤合南陽之近親華鄂承跼旌樂和於列邸犬牙交
壤寄雄畎於師旄既行爰田之封又陪真食之入助建
大統圖繫老成於戲積厚者流長雖本神明之祚德隆
者爵重况如宗族之賢均履多样勉欽渥命

賢妃苗氏進封德妃制

王珪

帝居六宮之制率輔於皇猷天極四星之華實裨於壺
事朕嗣膺邦統思穆人倫褒臨妃掖之英化始宸闈之
順命龜薦日班綈布朝賢妃苗氏性資惠明儀度閒肅
居蹈箴圖之戒動循珎珮之繇八月良家早被後庭之
選平陽別館爰開貴主之祥而能進遠驕華舉思謙畏
褊衣奉祀上以贊於后勤彤史流徽下以儀于嬪則庸
賁德言之茂益隆位序之崇名以副勞議非能典於戲

坐而論婦之禮蓋視三公之尊內有進賢之心始安君子之佐維正道然後式于外顧私謁不可黷于中往服訓辭永綏寵命

皇長女德寧公主進封徐國公主制

王珪

周美王姬之華下王后之一等漢推帝女之寵主同姓之諸公故至愛形而九族歡內則正而四海順乃睠公宮之懿適從世閥之逮宜合丕彝用孚羣德皇長女德

寧公主僊支襲慶邦媛流徽鍾天性之深慈躬女圖之
茂矩幼而勤組紉之習亦既飭婦事之修長則有室家
之歸將以經人倫之始維衿鞶之有命維車馬之有行
卜仲冬之嘉辰祉大易之元吉瓊華在著已戒齊風之
醕粉水疏園莫如徐國之樂侈燕謀於皇裔充美化於
民間顯錫徽章大旌柔度於戲前攬唐家之制盟饋不
可以闕供近稽仁廟之櫛冠服仍從於少損益肅雍者
賢之檢儉約者古之師其體至懷自膺長譽

除富弼尚書左僕射充觀文殿大學士集禧觀使

制

呂公著

聖王賦祿所以崇德而勸勞賢者辭隆所以激貪而厲俗眷我外相惟時宗工願還重紱之榮益露累章之請既重違於悃悞宜特示於褒優載揆剛辰式敷渙號推誠保德崇仁忠亮佐運翊戴功臣武寧軍節度徐州管内觀察處置等使開府儀同三司檢校太師同中書門下平章事行徐州大都督府長史上柱國鄭國公富弼

體資忠亮識蘊淵閎炳嶽瀆之粹靈挺棟橐之厚器光
輔仁祖蔚為文武之師迨事先皇實總機衡之要引疾
遽辭於大柄均勞式殿於近邦未移巖石之瞻併及洪
河之潤肆予纘紹尤渥儀刑雖體力之未平顧風猷之
克壯而乃過持冲守深遜寵名諭言已周誠意彌確朕
惟安危所寄雖賴老成之人損益有規宜伸大雅之志
俾進班於左揆聽復節於中臺仍總領於殊庭竚論思
於秘殿用彰寵數蓋示眷懷於戲進止不膠共扶於名

義幽明有相終畀於壽臧風於四方時汝之德

除富弼依前尚書左僕射兼門下侍郎同中書門
下平章事昭文館大學士兼譯經潤文使鄭國
公制

鄭獬

東籙膺圖將繼配天之大業銓時論道必資名世之元
臣以言乎體貌則舊德之英以言乎望實則羣材之表
爰立作相宜莫如公丕昭寵數之殊孚告治朝之聽具
官富弼智資大雅德懋碩膚學足以造聖人之微幾足

以通天下之變繇賢科之得雋據遠業以奏功在仁祖
時則首冠廟堂有弼諧九德之美在英考世則再登樞
府有折衝萬里之謀庶績已熙太平將洽屬留侯之多
病容裴度以為藩愷悌所宜神明自復方王家之不造
固賢者之有為昔居畎畝而志猶在於愛君今處朝廷而
義豈忘於憂國是用召從方守進拜元台仍左揆之舊
班兼東臺之茂秩爰田衍賦盟府易勲茲實異恩庸昭
注意於戲上理乎天工則日月星辰以之順下遂乎物

宜則山川草木以之蕃近則諸夏仰德以承流遠則四夷傾風以待命凡予欲治惟爾責成勉盡嘉猷用光丕訓

邢氏進號賢妃制

孫洙

王宮六寢崇建婦官天極四星垂著妃象所以協宣陰教助穆宸闈矧視秩於上公必敷求於淑哲朕厲精於治選納尤希嬪嬙靡充位號多闕茲延登於邦媛用播告於路朝婉儀邢氏德稱後庭體合法相居念保阿之

訓動循環珮之音授弓矢於媒祠占熊羆於吉夢是宜
詳按舊典升備列妃進參禴狄之華益昭彤管之煥坐
論婦禮正始國風品冠六儀名超九御於戲周南之詠
卷耳無險詖私謁之心齊詩之美鷄鳴有警戒相成之
道寵靈烜赫禮秩優隆匪時婉孌之良疇若褒嘉之命
佐后內治爾尚勉哉

陳升之起復同中書門下平章事集賢殿大學士

制

元絳

閔子經而服政先賢稱得事君之宜晉侯墨而臨戎前
志謂達變禮之用矧予丞弼奄邁閔難久虛席以思賢
宜敷朝而渙號具官陳升之蘊渾厚之量挺高明之材
體備四氣之至和智通萬方之遠畧發紓一德感會三
朝經武斗樞之庭則王靈震疊贊元鼎鉉之府則邦治
協寧端正百度之原章明九叙之極向鍾家疚越解政
均稽之師言厥有前憲桓焉奪服其惟詔使之從趙喜
離憂未始宰司之去盍來復於台路以大熙於天工於

戲繼恩從權自昔弗踰於國制移孝扶義維時尚又於
王家勉一廼心無替朕命

除皇弟願保信保靜軍節度使進封嘉王制

元絳

史謂建大宗之封如安磐石之固詩美得同氣之助若
敷常棣之華朕紹五聖之休昭九族之序固已倚天屬
於本根之重措公姓於翰幹之彊況於至親宜有顯冊
播告羣位厥維大公具官願燕翼發祥溫恭迪哲英姿

茂而玉裕盛氣粹而揚休講藝服儒多推道術之對好
勇樂善雅有智思之文鄉稽立愛之經屢衍建侯之寵
有華上公之袞有倣元戎之旂賢儀寢明師論參穆是
用端筴以審繇按圖而定名表為真王奄受樂國畫岷
峨之野陪以爰田易肥渙之麾加之兩組循典常而出
閣謹著定以奉朝列第環宮彌聳開元之觀側門通禁
永承長樂之顏備飭愛懷布章慶譽於戲展親以誠信
我則友于天倫秉德以輔陪爾則蕃於王室思長富貴

之守懋底忠孝之成往其欽哉以對猷訓

除韓琦京兆尹再任判大名府制 元 絳

分陝稱伯召南當公職之尊啟魏就封畢萬得國名之
大況吾元老為世宗臣久倚師垣之嚴宜遷尹節之寵
飭宣典策專告縉紳具官韓琦道醇而深器遠而博渾
渾忠孝之業憲憲文武之姿感通仁朝亮衆采於台極
翼戴英考捧大明於天衢肆朕纘圖厥初訪落燮諧四
氣之序熙輯百官之成登昭公槐奄泣國社鎮定大事

妥如九鼎之安承寧諸侯端若元龜之信歲勤再閱師
律既和重念郊圻之雄旁據河山之險徒得君重以宣
王靈就更西雍之旄留主北門之鑰載敦爰賦并實幹
封於戲漢咨陳平安危注於上意唐用裴度輕重繫乎
厥身維迺純誠無愧前烈懋服休命往其欽哉

除韓絳觀文殿大學士知許州制 元絳

國家登延弼疑內以起功於庶事圖畀藩翰外以發政
於四方閔勞申恩倚重均體肆專丕號庸諡廣朝具官

韓絳躬莊厚之姿函忠忱之度濟世美以特立告辰猷
而具臧屢陪國均實輔台德嚮自保釐之寄再膺翼亮
之姿高平師師總修衆職之果公孫斤斤參聽百官之
成久宣於勤間憇以疾確辭幾務之劇祈即燕申之休
感於朕聰姑徇爾欲宜還宰執徃建州麾陟春官常伯
之尊兼禁殿隆儒之冠載更切號增衍井封於戲乃眷
臣鄰雖爾身之在外不忘壽考豈茲心之謂遐其服寵
章以將福履

除燕達武康軍節度使充殿前副都指揮使勲封


如故制

李清臣

祈父之官司王介士上將之任為國虎臣予得智勇之
材俾共左右之位誕敷休命播告大庭具官燕達拔迹
戎行厲躬武節深明分數之守兼識變通之權捍外侮
於西陲佐濯征於南服嘗鼓儼趨阨以奮率烝徒能降
城艾旗以盪定逋寇夙付簡稽之籍進督號噉之軍人
知訓齊衆不譁教是嚴師律擢扈殿巖越從廉車遂愬

齋鉞於戲惟威愛足以臨下惟忠義可以報君勤懋乃
心欽迪朕意

宋文鑑卷三十五



總校官庶吉士 臣張能照

校對官中書 臣胡紹基

謄錄監生 臣熊夢祖

欽定四庫全書叢要

集部

宋文鑑卷三十八

六至

詳校官候選知縣臣吳甸華




欽定四庫全書叢要卷一萬九千九百五十九

集部

宋文鑑卷三十六

宋 呂祖謙 編

制


除皇伯宗暉依前檢校右散騎常侍充淮康軍節
度使特封濮國公加食邑今實封餘如故制

鄧潤甫

禦侮尚親先王未之或改折衝授鉞天下所以久安
惟尊屬之賢蚤有皇支之譽其敷褒律以告治庭皇伯

邕州管内觀察使金紫光祿大夫檢校右散騎常侍持
節邕州諸軍事邕州刺史兼御史大夫上柱國天水郡
開國公宗暉器宇閎深履尚方重詩書自樂慕漢邨宗
英之聞孝友夙成有濮園天性之愛爵隆而無驕貴之
累祿富而懷約已之風陞拜廉車之崇益增公族之重
是用疇庸躡等韓域展圖付名部之整軍奉賢王之明
祀維衮及繡視上公之儀錫山與田壯元戎之寄無陪
真賦庸示寵章於戲親親主恩非異數無以昭其意繼

繼在德惟馴嗣可以孚于休更恢遠猷以稱茂渥

立皇太子制

鄧潤甫

建儲非以私親蓋明萬世之統主器莫若長子茲本百
王之謀朕荷天地之況臨席祖宗之詒燕迺睠上嗣之
貴蚤應前星之祥宜告大廷誕揚丕號皇子彰武軍節
度使延州管内觀察處置等使檢校太尉開府儀同三
司持節都督延州諸軍事延州刺史上柱國延安郡王
某溫文日就睿智夙成回馳道之車能止班輪之驚

辨南陽之牘允符東海之休自疏錫於王封益光華於
德望勝衣視膳溢然孝友之姿好禮受經不煩師傅之
誨是用厯盛陽之嘉日舉列聖之大章肇正青宮肆敘
顯冊以協離明之吉以係天下之心於戲立愛始親商
以成千歲之業建嗣必子漢以撫四海之民斯為永圖
往膺徽典

封荊王顏太傅武寧鎮海節度使制

鄧潤甫

朕罹國大憂紹天明命黃陵玉座永懷復土之深清
廟朱紘序陟寧神之禮哀恫罔極感慕從中念宗藩
尊屬之賢有文考同生之愛圖功甚茂送往良勤敷
告大廷肆敘贊冊皇叔武昌武安等軍節度鄂州潭
州管内觀察處置等使守太保開府儀同三司持節
都督鄂州潭州諸軍事鄂州潭州刺史上柱國荆王
賜贊拜不名頡身端而行治識遠而量夷地則茂親
時惟明德翼戴王室雅有二南之風表儀宗枝獨包

兩獻之學協策廟社乃心朝廷昨朕承祧疇勞錫命屬
緝裕陵之禮遠護靈駕之行事有感懷義當褒異是用
進以官班之等寵之帝傳之崇出節徐郊建麾青社以
應采菽來朝之賜以慰崇棣孔懷之情於戲詩美大宗
是為四國之翰禮尊叔父固曰一人之嘉往服寵光益
膺福祉

除皇弟僖武成軍節度使祁國公制

鄧潤甫

朕奉承燕謀獲紹大統永懷先烈曷勝哀疚之情眷顧
同生宜厚褒封之典孚我明命揚于治廷皇弟猷岐嶷
得於自然溫文見於異稟挾天材之美質應帝武之嘉
祥未臨射矢之辰遽起號弓之慕踰年於此錫壤惟時
矧周人尚親尤重本支之務漢廷左戚亦隆襁褓之封
規裁半楚之疆載徹濱河之域苴茅制社授鉞殿邦用
建上公尹茲北國策勲加等衍邑實租於戲西望裕陵
敢忘幼子之愛東朝長信進頌諸孫之游往服恩輝益

延壽社

除司馬光左僕射制

鄧潤甫

帥羣臣宿道而嚮方在慎取相佐王者修政而美國莫若求人顧惟眇躬獲嗣大統儲思業業不敢忘六聖之休注意賢賢將以總萬方之儉衷進上宰敷告外庭正議大夫守門下侍郎司馬光受材高明履道醇固智足以任天下之重學足以知先王之言逮事厚陵徧儀侍從之列被遇文考擢總樞機之繁有大臣特立之風蹈

君子難進之節方予訪落之始起應秉均之求調娛萬
幾必先教化之意辨察百職不失禮義之中是用諮諏
僉言褒加異數越陞左揆之路兼峻東臺之班申衍爰
田陪敦真食於戲上寅亮於天心則陰陽風雨以之順
下遂字乎物理則山川草木以之寧內阜安於兆民外
鎮撫於四裔蓋輔相者為之基杖而老成者重於典刑
勉行所聞以底極治

除文彥博平章軍國重事制

鄧潤甫

師傳道之教訓先王所以迪厥官老成重以典刑天下
所以資其智廼瞻舊德時謂元勲謀合祖宗之心名載
鼎彝之器申放贊策播告外朝河東節度管內觀察處
置等使守太師開府儀同三司太原尹致仕上柱國潞
國公文彥博惇大而清明方嚴而信厚出則秉乎旄鉞
入則總我鈞衡文武兼備其才夷險能致其力畢公之
弼四世三紀于茲傳說之總百官萬邦其又爵隆無富
溢之累名遂有身退之榮神明相其壽康人心想其風

采是用還之論道倚以經邦以帝者之師臣謀議廟堂之上以天下之大老制馭夷狄之情庶幾有為底于極治陪敦多井申衍真封於戲呂望惟賢起佐文王之治周公已老留為孺子之師矧我耆英無愧前哲往宣一德用格多盤

除呂公著右僕射制

鄧潤甫

國莫難於置相君莫重於知人堯舜之隆蓋以疇咨而熙載商周之盛至以夢卜而求賢天降割于我家子未

堪於多難思用耆德交秉政鈞其敷寵章以詔羣辟金
紫光祿大夫門下侍郎上柱國東平郡開國公呂公著
行應儀表學通本原忠義得於天資功名自其世美被
遇先帝嘗入贊於樞庭暨予冲人遂同寅於政路傳經
意以謀國體推上澤以紓民心敘收雋賢補苴法度方
重不倚雅有大臣之風調娛適中遂通當時之務是用
陞之右揆委以繁機申衍爰田陪敦真賦爾則代天而
理物予則羞者以惟君於戲丞相之位未嘗無其人儒

者之效久不白於世孟軻言無有者數百歲揚雄稱自得者二三臣蓋廸遠業者其功難循近迹者其力易勉行所學以底丕平

除呂公著守司空同平章軍國事制

蘇軾

仁莫大於求舊智莫良於用衆既得天下之大老彼將安歸以至國人皆曰賢夫然後用今朕一舉仁智在焉宜告治朝以孚大號金紫光祿大夫守尚書右僕射兼

中書侍郎上柱國東平郡開國公呂公著訐謨經遠精
識造微非堯舜不談昔聞其語以社稷為悅今見其心
三年有成百揆時敘維乃烈考相于昭陵蓋清淨以寧
民亦勞謙而得士凡我儀刑之老多其賓客之餘在武
丁時雖莫追於前烈作召公考固無易於象賢而乃屢
貢封章力求退避朕重失此三益之友而閔勞以萬幾
之煩是用遷平土之司釋文昌之任毋廢議論時遊廟
堂於戲大事雖咨於房喬非如晦莫能果斷重德無逾

於郭令而裴度亦寄安危罔俾斯人專美唐世

除呂大防太中大夫守尚書左僕射兼門下侍郎

制

蘇軾

朕聞天子有道其德不可得而名輔相有德其才不可得而見故漢之文景紀無可書之事唐之房杜傳無可載之勲當時安榮後世稱頌予欲清心而省事不求智名與勇功天維顯思將啓承平之運民亦勞止願聞休息之期眷予元臣咸有一德咨爾百辟明聽朕言中大

夫守中書侍郎上柱國汲郡開國公賜紫金魚袋呂大
防造道淳深受才宏毅果藝以達有孔門三子之風直
大而方得坤爻六二之動久踐右闥蔚為名臣宜陞左
輔之宗兼綜東臺之務加賦進秩寵數益隆得位興時
憂責彌重於戲若古有訓無競維人崔公建中之風以
除吏八百而致裴均元和之政以薦士三十而能惟公
乃心何遠之有

除范純仁太中大夫守尚書右僕射兼中書侍郎

制

蘇軾

朕惟朝廷之盛衰常以輔相為輕重若根本彊國精神
折衝故薦呂臣奉已而不在民則晉文無復憂色汲長
孺直諫而守死節則淮南為之寢謀朕思得其人付之
以政使天下聞風而心服則人主無為而日尊咨爾在
廷咸聽朕命中大夫同知樞密院事上柱國高平縣開
國伯賜紫金魚袋范純仁器遠任重才周識明進如孟
子之敬王退若蕭生之憂國朕覽觀仁祖之遺迹永懷

慶厯之元臣強諫不忘喜臧孫之有後戎公是似命召
虎以來宣雖兵政之與聞疑遠猷之未究坐論西省
進貳文昌增秩益封兼隆異數於戲時難得而易失民
難安而易危子欲守在四夷以汝為偃兵之姚宋子欲
藏於百姓以汝為息民之蕭曹勉思古人以稱朕意

除苗授武泰州軍節度使克殿前副都指揮使制

蘇軾

出總元戎作先聲於士氣入為環尹寓軍政於國容將

伸聞外之威以迪師中之吉咨于爾衆朕得其人侍衛
親軍步軍副都指揮使威武軍節度觀察留後持節福
州諸軍事福州刺史上柱國濟南郡開國公苗授早以
異材見稱武畧被服忠義有烈丈夫之風砥礪廉隅得
士君子之槩荐揚邊圉益著勞能拔自衆人既蒙先帝
之遇遂拜大將無復一軍之驚祇扈殿岩肅將齋鉞予
欲少長有禮而兵可用汝其夙夜在公而令必行於戲
愛克厥威罔功茲為深戒師衆以順為武古有成言惟

懋乃衷毋忘朕訓

除皇伯祖宗晟特起復制

蘇軾

曾閔之哀喪不貳事漢唐之舊禮有奪情矧予藩屏之親實無臣子之重雖閨門以恩掩義而公侯以國為家伯臣司宗職不可曠要經服事古有成言非予爾私其聽朕命皇伯祖彰化軍節度涇州管內觀察處置等使檢校司空開府儀同三司持節涇州諸軍事涇州刺史判大宗正事上柱國高密郡王宗晟天資純茂德履方

嚴襲餘慶於祖宗蹈格言於師保典司屬籍克有令名
郢客卒業於浮丘辟疆受知於先帝允隆厥位無愧昔
人屬此閔凶纍然毀瘠嗟日月之逾邁重職業之久虛
宜復寵名式從權制於戲出居官次非王事不談退適
倚廬讀喪祭之禮則忠孝兩得人無間言功名益隆親
有顯譽勉服朕訓光昭前聞

西蕃邈川首領阿里骨加食邑制 蘇頌

祭有十倫之義施爵賞以為先福者百順之名本忠孝

之自出朕祗祓陽館崇嚴禰宮配神穹昊之尊流澤幅
員之廣嘉與卿士同茲慶休便蕃優渥之恩固無內外
之異告于朝窠布乃言綸西蕃邈川首領河西軍節度
涼州管內觀察處置押蕃落等使金紫光祿大夫檢校
太保持節涼州諸軍事涼州刺史上柱國寧塞郡國公
阿里骨生有軼材少負偉略稟天地之義氣得秦豳之
遺風奠塞外之封疆繼承列土擁河西之旄鉞坐護諸
羌長雄一方作我西屏屬九筵之講禮盛四海之駿奔

來獻其琛實相予祀是用加命王公之數視秩帝傳之
崇增井賦於爰田廣國租於真食於戲爾有時享歲貢
之恪史不絕書我有餽神觀政之方惠必及下旣均承
於純嘏宜益厲於忠規往服訓言克享天祿

劉昌祚加恩制

蘇轍

朕因路寢之正舉合宮之祠禮樂法商周之隆車服兼
漢唐之盛出款原廟還享上穹職貢克庭工師履位兵
衛如植旌旆不煩實惟有人以克成禮殿前副都指揮

武康軍節度洋州管內觀察處置等使持節洋州諸軍
事洋州刺史上柱國彭城郡開國侯劉昌祚天姿鷲勇
惟本忠良結髮征羌號馬上之飛將授鉞臨塞皆關中
之要區方西鄙之須材會中軍之謀帥畀之旄節之重
付之貔虎之師歸閱浹旬旋聞輯睦逮此熙成之慶賴
其宿衛之勤既增封爵之崇仍加真食之厚於戲古之
明主立賞以待有功古之賢將有功而恥自列服子需
澤之異勉爾勲名之思貴當益恭老當益壯

除文彥博太師河東節度使致仕制

蘇轍

周公未嘗之魯老亦居豐留侯晚雖彊食終不任事蓋
委寄之重初無間然而止足之風所不敢廢惟我耆舊
厯事祖宗纘服之初復命以位雖師保之地優佚不煩
而丘樊之心朝夕以請布告在位俾聞高風太師平章
軍國重事上柱國潞國公文彥博克孝而忠允文且武
其在師旅有方召之勲其在朝廷有崇璟之業士民視

其去就夷狄震其威名時更四朝躬蹈一節先皇帝慈
勞以事既許其歸越予訪落之年凜有涉淵之志起之
既老待以仰成出入五年終始全德進而論道日聞典
訓之言倚以折衝卒靖邊防之警委成功而不處指莫
景以求安動請屢聞誠心莫奪顧瞻閭井近在洛師郭
氏有永巷之嚴裴公有綠野之勝豈以簪紱之累久致
形氣之勞貴極上公既無復加之爵秩分領全晉仍畀
久還之節旌增廣舊封益衍真食殫盡人臣之寵歸從

父老之游於戲音聲不遐尚有就問之禮几杖以俟復
斯親祀之陪勿以進退之殊而廢謨猷之告式燕且譽
俾壽而康

文彥博司徒判河南制

曾布

秉國大均絕席廟堂之上經時常武運籌樽俎之間維
吾老成多所更踐懇辭幾務往殿近藩敷告于廷進疇
厥位推忠協謀崇仁同德經邦贊治守正保運亮節佐
理功臣樞密使劍南西川節度管内觀察使處置橋道

等使開府儀同三司守司空檢校太師兼侍中兼群牧
制置使行成都尹上柱國潞國公文彥博器質宏偉智
謨靖深逮事祖宗蚤登丞弼周旋左右當四海之具瞻
密勿樞機寔萬邦之為憲肆予纘御屬在倚毗深惟注
意之勤勉徇均勞之請眷言耆舊宜所裒崇增秩上公
衍封真賦光華故里揭全晉之旌旌偃息名城壯陪京
之屏翰出入中外始終顯榮於戲進而論道經邦則必
告嘉猷于后退而承流宣化則必下膏澤於民惟往欽

哉尚多受祉

除范純仁觀文殿大學士知潁昌府制

曾布

謀謨廟堂入則股肱於大政偃息藩翰出則師帥於一方維時宗工引疾辭位均逸近輔敷告大庭通議大夫守尚書左僕射兼中書侍郎上柱國廣平郡開國公范純仁端良稟於世資樂易成於天性有砥名厲行之志有面折廷爭之風越自累朝漫更華選暨冲人之嗣服

適文母之仰成咨於臣鄰付以宥密一踐樞要再持國
鈞朕恭己紹庭嚮明圖治緝熙緒業追邁先猷分有望
於弼諧遽固辭於機務重違爾志姑即厥安增視秩之
榮名進陪封之寵數式隆體貌何吝眷私於戲論道經
邦常在倚毗之地承流宣化勿忘勵翼之心祇服朕言
往共爾位

立皇后孟氏制

梁 燾

正家者義之先天下從而定矣大昏者禮之本聖王所

以重焉朕繼體持盈側身思永方切基圖之固敢娛宮
室之安太母以萬世為心命度宗事之重大臣以兩極
陳義請建坤儀之尊謂王道之大所由興故人倫之始
不可緩明揚德閼之懿簡在慈闈之公欽承溫詔之音
俾正中宮之位載蠲吉日敷告大庭故侍衛親軍馬軍
都虞候眉州防禦使贈太尉孟元孫女忠孝令門善慶
奕世幽閑專靜藹聞和聲婉睦惠慈雅應柔則天作之
合文定厥祥人謀協從龜告并吉是宜入聽內職輔宣

外和式瞻禕翟之章上直軒龍之象嘉典大備並行今
古之情文盛德有開增美國家之治理於戲惟恭儉為
富貴之守惟憂勤為康樂之資如闕睢之進賢則可以
基風化之成如樛木之逮下則可以將福履之盛用久
乃濟匪初其難勉爾欽修以法三宮之端一相予顯祀
以崇七廟之清明垂光紫庭襲譽彤管可立為皇后

徐王改封冀王制

范祖禹

周尊公旦倚為四輔之師漢重王蒼位處三公之上及

我仁祖加禮荆王顧惟冲人敢後叔父誕敷明命播告
治廷皇叔永興鳳翔等軍節度管内觀察處置等使守
太尉開府儀同三司雍州牧兼鳳翔牧上柱國徐王賜
詔書不名顯稟訓英皇同氣神考仁義根于天性孝友
冠于人倫昔在先朝蚤膺異數迨宣后九年之政無愛
子一毫之私追惟崇慶之功罔極昊天之報方畢太宮
之祔饗莫先尊屬之褒嘉是用登拜師垣仍聯使節徹
彼徐土受茲冀方內獎皇家外綏侯服進陪多賦衍食

真封於戲並建親賢實為社稷之衛益彊藩屏用承祖
考之休往膺典冊之光永介壽祺之祉式昭令德無愧
前人

除向宗良檢校司空克醴泉觀使昭信軍節度使

制

曾肇

昔周盛世則有申伯之良翰在漢懿親則有少君之長
者眷吾仲舅蚤著賢稱登進寵名誕敷詔號休泉觀使
秦國軍節度明州管內觀察處置等使持節明州諸軍

事明州刺史上護軍河內郡開國公向宗良席慶深厚
秉德粹溫富貴無自滿之心恭孝有夙成之質肆朕承
祧之始首膺授鉞之榮茲屬東朝亟還大政念崇德報
功之誼將錫異恩守右賢左戚之規莫回慈旨換節瀕
江之地參華空土之名增衍戶租併申朕志於戲維我
太母有勞皇家方其艱虞則出任社稷之重及底康靖
則還就宮闈之安動靜必惟其時進退靡失其正而猶
鑒觀前載深抑外親爾其念長樂之好謙思文簡之垂

裕益堅素履永保令名

除皇弟似守太保依前開府儀同三司蔡王克保

平鎮安等軍節度使制

曾肇

朕惟本朝之制厚公族之恩列第京師不忍使之去國
兼榮將相未嘗責以治民豈惟致敦叙之仁抑亦隆夾
輔之勢矧吾寵弟實位真王念方屬於妙齡將即安於
外邸雖云密邇能不疚懷肆舉徽章用字衆聽皇弟武
昌武成等軍節度鄂州滑州管内觀察處置等使守司

徒開府儀同三司持節都督鄂州滑州諸軍事鄂州滑
州刺史上柱國蔡王似出神明之胄鍾祺祝之祥氣稟
溫良生知遜悌雅愛圖書之習夙堅忠孝之誠桐葉疏
封已侈盤維之寄棣華致好每敦和樂之私比遵朝著
之趨尚處宮隅之遽屢觀啓奏祈避禁嚴志雖莫回情
實未忍思在宗之誼豈忘原隰之哀顧開府以時難廢
國家之典廼涓穀旦增峻官儀更兩鎮之節旄正三師
之位叙兼陪井賦益壯宗藩於戲周誥孟侯則曰無康

好逸漢詔諸子亦云無邇宵人蓋位不期驕者人情之
常寵至益戒者前哲所尚往服休命永綏令名

除曾布右僕射制

曾肇

左右置相以總吾喉舌之司東西分臺以幹我鈞衡之
任居中如鼎足之峙承上若台符之聯相須而成闕一
不可廼登次輔以告大廷左光祿大夫知樞密院事上
柱國魯郡開國公曾布敏識造微懿文貫道器周小大
之用智適古今之宜被神考特達之知亟躋禁從膺先

朝倚注之重久執事樞而能悉心公家宣力夙夜忠以
迪上誼不辭難憂勤百為壯老一節肆朕纂臨之始尤
嘉翼戴之勞參稽師言圖任舊德文昌端揆之列紫微
陪侍之班合茲寵名作我近弼仍遷階品增衍戶封於
戲朕有休息百姓之心汝則覲文而匿武朕有綜覈庶
工之志汝則務實而去華以至甄序材良敦獎正直澄
清風俗振肅紀綱使萬物各得其平無一夫或失其所
汝之職也尚往欽哉

復元祐皇后制

蔡京

朕紹休烈聖承訓東朝施惠行仁既誕孚於有衆念今
追往用敦叙於我家廢后孟氏項自勲門嬪于王室得
罪先帝退處道宮逮茲累年克庸祇德皇太后念仙遊
之浸邈撫前事以興悲惻然深矜示不終廢申崇位叙
還復宮庭乃詔輔臣具依審議雖元符建號已位於中
宮而永泰上賓無嫌於並后於戲原情起義蓋示親
親之恩克己慎身宜成婦婦之道其率循於懿範以上

答於深仁往服茂恩永膺多福

蔡京降太子少保致仕制

張閣

政事所寄尤嚴誤國之誅人臣之姦莫重欺君之罪我有常憲揚于大庭太師致仕楚國公蔡京頃以時才久膺柄任兩冠台衡之峻三登公衮之崇庶圖爾庸以弼予治而總秉機務出入八年事寢紊於將來謀悉違於初議擅作威福妄興事功輕爵祿以示私恩濫錫予以蠹邦用借助姻婭密布要途聚引光邪合成死黨以至

假利民而決興化之水託祝聖以飾臨平之山豈曰懷
忠殆將徼福屢有告陳之迹每連狂悖之嫌雖僅上於
印章猶久留於里第偃蹇弗避傲睨罔悛致帝意之未
孚昭星文而申譴言章繼上公議靡容固欲用恩難以
屈法宜褫師臣之秩俾參宮保之官聊慰群情尚為寬
典於戲天事尚衆明罰所以弭灾人道惡盈省躬所以
引咎往欽善貸無重後愆

宋文鑑卷三十六